



Komisija za očuvanje nacionalnih spomenika, na temelju člana V stav 4. Aneksa 8. Općeg okvirnog sporazuma za mir u Bosni i Hercegovini i člana 39. stav 1. Poslovnika o radu Komisije za očuvanje nacionalnih spomenika, na sjednici održanoj od 10. do 16. marta 2009. godine, donijela je

## ODLUKU

### I

**Spomenička cjelina i historijsko područje – prahistorijska gradina, kasnoantička utvrda – refugij, ostaci kasnoantičke crkve posvećene sv. Luciji i nekropole sa stećcima u Podastinju, općina Kiseljak**, proglašava se nacionalnim spomenikom Bosne i Hercegovine (u daljnjem tekstu: nacionalni spomenik).

Nacionalni spomenik čini arheološko područje – ostaci ilirske gradine, kasnoantičke utvrde – refugija, kasnoantičke crkve posvećene sv. Luciji i nekropole sa stećcima na lokalitetima Crkvina (2 stećka), Grčko/kužno groblje (67 stećaka) i Vrbica (dislocirano 6 stećaka).

Nacionalni spomenik se nalazi na prostoru koji obuhvata k.č. 1058, posjedovni list broj 187 (novi premjer), što odgovara k.č. 1748 (stari premjer), posjedovni list broj 11-II, z.k. uložak broj 257, k.č. 1731/1 (stari premjer), z.k. izvadak broj 1796, k.č. 1059, posjedovni list broj 56 (novi premjer), što odgovara k.č. 1752/6 (stari premjer), z.k. izvadak broj 209, k.č. 1061, posjedovni list broj 56 (novi premjer), što odgovara k.č. 1752/11 (stari premjer), z.k. izvadak broj 209, k.č. 998, posjedovni list broj 229 (novi premjer), što odgovara k.č. 1754, posjedovni list broj 795, z.k. izvadak broj 1904, k.č. 999, posjedovni list broj 48 (novi premjer), što odgovara k.č. 1756 (stari premjer), z.k. izvadak broj 1927, k.č. 1066, posjedovni list broj 54 (novi premjer), što odgovara dijelu k.č. 1752/5 (stari premjer), z.k. izvadak broj 209, k.č. 1259 (novi premjer), posjedovni list broj 75 (novi premjer), što odgovara k.č. 414 (stari premjer), z.k. izvadak br. Iskaz I, k.č. 117, posjedovni list broj 197 (novi premjer), što odgovara k.č. 207 i 208/1 (stari premjer), z.k. izvadak broj 236, k.o. Podastinje, općina Kiseljak, Federacija Bosne i Hercegovine, Bosna i Hercegovina.

Na nacionalni spomenik se primjenjuju mjere zaštite utvrđene Zakonom o provođenju odluka Komisije za zaštitu nacionalnih spomenika, uspostavljene prema Aneksu 8. Općeg okvirnog sporazuma za mir u Bosni i Hercegovini («Službene novine Federacije BiH» br. 2/02, 27/02, 6/04 i 51/07).

### II

Vlada Federacije Bosne i Hercegovine (u daljnjem tekstu: Vlada Federacije)

dužna je da osigura pravne, naučne, tehničke, administrativne i finansijske mjere za zaštitu, konzervaciju i prezentaciju nacionalnog spomenika.

Komisija za očuvanje nacionalnih spomenika (u daljnjem tekstu: Komisija) utvrdit će tehničke uvjete i osigurati finansijska sredstva za izradu i postavljanje informacione table sa osnovnim podacima o spomeniku i odluci o proglašenju dobra nacionalnim spomenikom.

### III

S ciljem trajne zaštite nacionalnog spomenika na prostoru definiranom u tački I stav 3. ove odluke primjenjuju se sljedeće mjere zaštite:

- dopušteni su isključivo istraživački i konzervatorsko-restauratorski radovi, uključujući i one koji imaju za cilj prezentaciju spomenika, uz odobrenje federalnog ministarstva nadležnog za prostorno uređenje (u daljnjem tekstu: nadležno ministarstvo) i stručni nadzor nadležne službe zaštite naslijeđa na nivou Federacije Bosne i Hercegovine (u daljnjem tekstu: nadležna služba zaštite);

- prostor spomenika bit će otvoren i dostupan javnosti, a može se koristiti u edukativne i kulturne svrhe;

- dopušteno je obavljanje radova na infrastrukturi samo uz odobrenje nadležnog ministarstva i stručno mišljenje nadležne službe zaštite;

- zona zaštite je potencijalno arheološko nalazište, te stoga nije dopušteno izvođenje bilo kakvih radova koji bi na bilo koji način utjecali na izmjenu područja i ugrožavanje spomenika, bez nadzora nadležnih službi i bez prisustva arheologa;

- zabranjeno je odlaganje svih vrsta otpada.

Vlada Federacije je dužna da posebno osigura provedbu sljedećih mjera:

- izradu geodetskog snimka postojećeg stanja;
- izradu Projekta sanacije, restauracije i konzervacije lokaliteta u Podastinju; sa vraćanjem stećaka iz parka u Kiseljaku na izvornu lokaciju;
- uklanjanje novoizgrađenih objekata na vrhu gradine (križ i spomen-ploča).

Projekat sanacije, restauracije i konzervacije treba sadržavati:

- arheološko istraživanje;
- čišćenje na lokalitetu ilirske gradine, stećaka od lišaja i mahovine i saniranje oštećenja;
- uređenje lokaliteta sa uklanjanjem samonikle vegetacije;
- uređenje pješačke staze za bezbjedan pristup spomenicima;
- postavljanje zaštitne ograde, klupa, korpi za otpatke, putokaza, oznaka za kretanje i sl.;
- izradu i provedbu programa prezentacije nacionalnog spomenika.

### IV

Svi pokretni nalazi, koji budu nađeni u toku arheološkog istraživanja, bit će pohranjeni u najbližem muzeju ili u Zemaljskom muzeju Bosne i Hercegovine u Sarajevu, obrađeni i prezentirani na odgovarajući način.

Iznošenje pokretnih nalaza koji u toku arheološkog istraživanja budu pronađeni na lokalitetu iz Bosne i Hercegovine, nije dopušteno.

Izuzetno od odredbe prethodnog stava, ukoliko voditelj istraživanja utvrdi da je neophodna obrada nekog nalaza izvan zemlje, dokaze o tome će prezentirati Komisiji, koja može dopustiti privremeno iznošenje nalaza iz zemlje pod detaljno utvrđenim uvjetima njegovog izvoženja, postupanja s njim u toku boravka izvan zemlje i njegovog povratka u Bosnu i Hercegovinu.

Nakon dostavljanja izvještaja o provedenom istraživanju, Komisija će utvrditi pokretne nalaze na koje će biti primjenjivane mjere zaštite koje Komisija utvrđuje.

## V

Stavljaju se izvan snage svi provedbeni i razvojni prostorno-planski akti koji su u suprotnosti sa odredbama ove odluke.

## VI

Svako, a posebno nadležni organi Federacije Bosne i Hercegovine, kantona, gradske i općinske službe, suzdržat će se od poduzimanja bilo kakvih radnji koje mogu da oštete nacionalni spomenik ili dovedu u pitanje njegovu zaštitu.

## VII

Ova odluka dostavit će se Vladi Federacije, nadležnom ministarstvu, nadležnoj službi zaštite i općinskom organu uprave nadležnom za poslove urbanizma i katastra, radi provedbe mjera utvrđenih u tač. II – VI ove odluke i nadležnom općinskom sudu radi upisa u zemljišne knjige.

## VIII

Sastavni dio ove odluke je obrazloženje sa pratećom dokumentacijom, koje je dostupno na uvid zainteresiranim licima u prostorijama i na web-stranici Komisije (<http://www.aneks8komisija.com.ba>).

## IX

Prema članu V., stavak 4. Aneksa 8. Općeg okvirnog sporazuma za mir u Bosni i Hercegovini, odluke Komisije su konačne.

## X.

Danom donošenja ove odluke, sa Privremene liste nacionalnih spomenika Bosne i Hercegovine (»Službeni glasnik BiH« broj 33/02, »Službeni glasnik Republike Srpske« broj 79/02, »Službene novine Federacije BiH« broj 59/02 i »Službeni glasnik Brčko Distrikta BiH« broj 4/03) briše se nacionalni spomenik upisan pod rednim brojem 293.

Ova odluka stupa na snagu narednog dana od objave u »Službenom glasniku BiH«.

Ovu odluku Komisija je donijela u sljedećem sastavu: Zeynep Ahunbay, Martin Cherry, Amra Hadžimuhamedović, Dubravko Lovrenović i Ljiljana Ševo.

**Predsjedavajući Komisije**

**Dubravko Lovrenović**

Broj: 02-2-40/09-10  
11. marta 2009. godine  
Sarajevo